

## **2016-imut Aningaasanut Inatsit pillugu Isumaqatigiissut**

**2016-imut Aningaasanut Inatsit pillugu Naalakkersuisut aamma Siumut, Atassut Demokratillu isumaqatigiissuteqarput. Anguniagassanik sammisanillu makkuninnga aallaavilinnik pilersitsissutinik nutaanik piareersaanissamik naammassisaqarnissamillu isumaqatigiissuteqarlutik illuatungeriit isumaqatigiissuteqarput:**

### ***2016-imut Aningaasanut Inatsimmi anguniakkat***

*Namminersortutut suliffeqarfiusumi piviusumik siuarsarnej kiisalu amerlanerusunik sulilersitsisussanik, inuussutissarsiutinik ineriartorfiusunik nutaanik ineriartortitsineq*

*Imminut annertunerusumik pilersugarinerup siuarsarnissaanut aqqissuusseqqinnerit*

*Inuiaqatigiit toqqissimasumik alliantorsinnaanissaat, inunnut ataasiakkaanut siunissami pitsaasunik periarfissallit*

*Attaveqartarfiit nukittuut aamma piumassutsimik ingerlatatut kattuffiit aqqutigalugit assigiinngisitaarneq*

*Pisortani suliffeqarfiusoq naammassisaqarsinnaanerusoq*

### **2016-imut Aningaasanut Inatsit pillugu isumaqatigiissummi sammisassat**

- Pilersitat piviusut inuussutissarsiorfiullu ineriartorfissaasa pitsanngorsarnerini, suliffissanik pilersitsiortornerup pitsanngorsarnerani suliffeqartut amerlisarnerani sinaakkutit pitsaanagerusut
- Attassisinnaanissamut siuarsaanissamullu pilersaarummut aggersumut naleqqat
- Meeqqanut inuusuttunullu suliassaqarfimmi iliuutsit imminnut ataqatigiissitat
- Tusagassiorfinnut tapiissutit pitsanngorsakkat, tamanik takunnissinnaaneq annertusisaq, tapiissuteqartarnernullu sinaakkutissat aalajangersimanagerusut
- Tunisassiorsinnaassutsip ineriartortittuarnissaa, aamma pisortani suliffeqarfiusumi inernerititanik pilersitsisoqarnissap alaatsinaannissaa

2016-imut Aningaasanut Inatsisip akuersissutigineratigut tamakkiisumik isigalugu piffissamut 2016-2019-imut IS-mi oqimaaqatigiissitsisoqarpoq. Tamatuma saniatigut isumaqatiginninniaqataasut allappaat qaleralinnut akitsuutip pilersaarutaasup pingajussaaneerlugu suliarineqannginnerani Aningaasanut Akileraartarnermullu ataatsimiititaliamit suliarineqassasoq, tassaniakitsuutip ilusaa piviusoq oqaluuserilluaqqinneqassaaq.

Aningaasanut inatsimmut isumaqatigiissutikkut ilanngussaq 1-imi takuneqarsinnaasunik pingajussaaneerinninnermut allannguutissatut siunnersuutit arlallit malitsigisaapput.

Taamaattorli ukiuni takkuttussani oqimaaqatigiinnerup qulakkeerniarneranut suli unammillerfissaqarpoq. Aningaasanut Inatsimmiipput sipaarutit, aaqqissuusseqqinnermi suliarisassat aningaasartuutunik annikillisaasut aallartisarneri, aammalu inuussutissarsiornermut tunngasumik siuarsaanissamut sinaakktissanik pitsaanerusunik pilersitsinissamik kaammattuutit.

Ukiuni sisamani aningaasaqarnikkut oqimaaqatigiinneq pillugu anguniagaq attatiinnarneqassappat 2017-imut Aningaasanut Inatsisissatut siunnersuummi akileraarutitut akitsuutinullu suliaasaqarfiusumi periusissianik ilassutissanik pisariaqartitsisoqalersinnaavoq, aammalu annertunerusumik imminik pilersuinermut piomassuseqassuseq inuiaqatigiillu imminnut napatinnerulersillugit ineriartortinnissat qulakkeerniarneqassallutik.

Taamaalilluni akisussaassusilimmik aningaasaqarnikkut politikkip ingerlannissaanik piomasaqaat innarlerneqanngilaq. Isumaqatigiissummut illuatungeriit suli isertitassanik nutaanik pilersitsiniarnissaq, aamma innuttaasut aaqqissuussaaneranni allannguutitut, pisortat karsiinut aningaasartuutunik annertusiartuaartunik nassataqartitsisussanut pisortat aningaasaqarnerannik naleqqussaajuarnissaq sammisariuassavaat.

**2016-imut Aningaasanut Inatsimmut isumaqatigiissummut, tassungalu atasunut isumaqatigiissutitut tamanik takussutissiaq**

	Siumut	Demokraatit	Atassut	Inuit Ataqaatigiit	Naleraq
2016-imut Aningaasanut Inatsit pillugu isumaqatigiissut	X	X	X		
Akileraarutitut akitsuutinullu suliaasaqarfimmi isertitat allissutaannut sillimmatit atuutsilernissaat pillugu isumaqatigiissut	X	X	X		
Attaveqarfinni aningaasaliinerit aningaasalersornissaannut sinaakktissat pillugit isumaqatigiissut					

Akileraarutitut akitsuutinullu suliaasaqarfimmi isertitat allissutaannut sillimmatit atuutisilernissaat pillugu isumaqatigiissut aallaavigalugu aningaasanut inatsimmut isumaqatigiissut makkuninnga ilalerlugu atsiorneqarpoq:

- sallsannngortitassanut nutaanut partiit kissaatigisaat, taakkuninngalu aningaasaliinerit,
- attaveqarfimmi aningaasaliinernut takkuttussanut aningaasaliinerit, aamma
- aaqqissuussinerni suliaasanut aningaasanut inatsimmut ilanngussatut – aamma takkuttussanut – siunnersuutit.

Aningaasanut inatsimmut Isumaqaqatigiissummut partiit isumaqatigiissuteqartut 2016-imut Aningaasanut Inatsit pillugu inaarutigisatut isumaqatigiissummi ilaasussamik attaveqarfimmi aningaasaliinerit aningaasalersornissaannut sinaakkutit pillugit immikkut ittumik isumaqatigiissuteqarniassapput. Isumaqaqatigiissutip aningaasaliinissanut aggersunut tunngaviusussanut tunngaviit nassuiassagai naatsorsuutigineqarpoq. Ilaatigut aningaasanut inatsimmi oqimaaqatigiinnermut ajoqusiinngitsumik, mittarfiliornissani aggersuni aningaasaliisussummik piviusumik nassaartoqarsinnaaneranut aningaasaliinernut tunngatillugu tunngavissanut, ilaatigullu mittarfiliornissamik taakkuninnga pingaarnersiuiinissamat tunngavissanut tamanna atuuppoq. Ineriartornissamat pisariaqartitsinermik nakkutiginnittumik kiisalu aningaasaqarnikkut akisussaassuseqartumik, inernissamik atasinnaasunik tunngaveqartunik, amerlanerpaanit isumaqatigineqartumik attaveqarnerup iluani aningaasaliinernik isumaqatigiissusiortut ujartuissapput.

Tamatuma saniatigut 2016-imut Aningaasanut Inatsisip naammassinerata kingornatigut akileraartarnermik, isumaginninnermik ineqarnermillu suliaasaqarfimmi takkuttussatut aaqqissuusseqqinnermik sulianut erseqqinnerusumik ingerlataqarnissamat pilersaarummik pingaarnertutitullu politikikkut najoqqutassaqaqarfissamik ataatsimoorussamik kissateqartoqarpoq.

### **Aningaasaqarnermi politikikkut anguniakkat**

Inunnut akileraarutaasut annertusinagit piffissami 2016-2019-imi DA-mi inerniliussami tamanik isiginnilluni sinneqartooruteqartuassanera isumaqatigiissutip ilaanut partiit isumaqatigiissuteqarput.

Isumaqaqatigiissummut makkuninnga partiit tunngaviliisimapput:

- pisortani suliffeqarfik ukiuni takkuttussani namminersortutut suliaasaqarfimmut naleqqiulluni annikinnerusumik alliaartussasoq. Tassaavoq namminersortutut oqartussani kommuninilu attartuumik aningaasaqarnikkut ineriartornerup pilersinnissaanut, aammalu namminersortutut suliffeqarfiusumi siuarsarnermik pilersitsinissamat tunngaviusoq,
- inuussutissarsiorfimmi savitunerusumik ineriartornerup periarfissinnissaanut sinaakkutissamik pitsaasunik pilersitsinissaq, nuna isertitaqarfimmi ikitsuaraannarnik allanik qinigassartaqanngitsunik pisariaqartitsiunnaarnerussalluni, aamma
- kommunini tamani ineriartortitsinermik pilersitsisoqassasoq.

## ***Namminersortutut suliffeqarfiusumi siuarsarnej sulilersussallu amerlanerusut anguniarlugit suliffinnik nutaanik pilersitsinermi ineriartortitsineq***

### **Pilersitat piviusut inuussutissarsiorfiullu ineriartorfissaasa pitsanngorsarnerini, suliffissanik pilersitsiortornerup pitsanngorsarnerani suliffillillu amerlisarnerani sinaakkutit pitsaanerusut**

Namminersortutut suliffeqarfiusumi suliffinnik nutaanik atasinnaasunillu pilersitsinissartik pingaernerutinniarlugu kiisalu amerlanerit suliffeqarfeqarfimmut isertinnissaanut iliuseqarnertik annertusarniarlugu partiit isumaqatigiipput. Uuma ataani takornariaqarnerup inuussutissarsiutitut nammaqataasussanngortinneqarnissaanut immikkut ittumik iliuseqartoqassaaq kiisalu aalisarluni inuussutissarsiutip aatsitassarsiorfiullu ineriartortinnissaanut iliuseqartoqaannassalluni.

Tamatumani suliniutinik nutaanik inuussutissarsiorfiup sinaakkutaanik pitsanngorsaanissami pilersitanillu naammassinninnissami anguniagaqartunik pisariaqartinneqarput, tamakkua suliffeqannginnerup akiorniarneqarnerani periusissami “Suliffeqarneq toqqissisimanartoq”-mi ukiunut arlalinnut atuuttumi ilaapput, aammalu ukioqatigiiaat assigiinngitsut amerlanerusut inuussutissarsiutigilersinnaasaminnik ilinniagaqalernissaasa pimoorullugu sulissutigineqarnissaa kiisalu inuussutissarsiuteqartut massakkut siunissamilu piginnaasalinnik sulisoqarnissamik pisariaqartitaat aallaavigalugit piginnaanngorsaanissamik suliniuteqartoqassasoq.

### **Inuussutissarsiorneq pillugu inatsimmik nutarsaaneq, tassunga ilanngullugit akileraartarnermut akitsuusiisarnermullu suliassa qarfiit**

Akileraartarnermut akitsuusiisarnermullu suliassa qarfinni aamma suliffeqarfimmut naleqqiullugu allaffeqarfinni, inuussutissarsiornermik ineriartortitsisinnaasuni, aningaasaqarnikkut ineriartortitsisinnaasuni atasinnaasumillu aningaasaqartitsisinnaasunik pisariaqartitsinermik qulaarsinissaq anguniarlugu siunnersuutinik inuussutissarsiorfiup Naalakkersuisullu akornanni suleqatigiinneq ingerlasoq partiit maluginiarpaat.

Aningaasaqarnikkut ineriartorfissanik nutaanik, suliffissanik amerlanerusunik pisortallu aningaasaqarnerannik pitsaanerusumik tunngaviliinissamut pingaaruteqarpoq pitsaasunik suliffeqarfimmut sinaakkusiornissaq. Politikkikkut anguniakkanik taaneqartunik tapersersuisussanik, suliaraqarfiusussaasussanik Inatsisissatut siunnersuutinik piviusunik 2016-imi kingornaluunniit saqqummiunneqartussanik suliap aallartinneqartup inernissaa partiit qilanaaraat.

Aamma inuussutissarsiorfiup sinaakkutai pitsanngorsarniarlugit suliassa qarfinni allani Naalakkersuisut suliniutinik nutaanik inatsisillu nutarternissaannut piareersaapput. Tamanna nalunaarusiamit, suliniutinik piviusunik arlalinnik innersuussutilimmik “*Kalaallit Nunaata Danmarkillu akornanni niuernermit inuussutissarsiutitigut suleqatigiinnerup siuarsarnera*”-nit aallaaveqarpoq, uuma ataani immikkoortut pingaernerit tulliupput:

- Nunatsinnit inuussutissarsiornikkut suliniutinut akiliisinnaassusilinnut Eksportkreditfonden-imit qularnaveeqqutit
- Den Nordiske Investeringsbankip ataani issittormiunut taarsigassarsianut sinaakkutissiaq
- Danmarkimi aamma Kalaallit Nunaanni, ingammik Asiami niuerfiusumut tunngatillugu kattutsitanik misigisassat sammisaralugit ataatsimoorussamik pilerisaarineq Visit Danmarkip Visit Greenlandillu akornanni suleqatigiinneq annertusisaaq

Inuussutissarsiorfiup aningaasanut attaveqarnera ajornannginnerulersinniarlugu kiisalu nunamut takornarissanik amerlanerusunik kajungilersitsiniarluni, innersuussutinik taakkuninnga politikikkukut pingaernerutittariaqakkanik piviusunngortitsinissaq partiit qilanaaraat.

### **Takornariartitsinermik inuussutissarsiut inuussutissarsiutitut napatitsisutut ineriartortinneqassaaq**

Takornariartitsinermik inuussutissarsiutit inuussutissarsiutitut napatitsisunngortinnissaanik ilungersuutaasut nanginneqarnissaat pillugu partiit isumaqatigiipput. Takornariartitsinermi isertitat amerlisut piffissamut ungasissumut namminersortutut suliffeqarfimmi annertusisamik siuarsarnermut, suliffeqartitsinerup annertusinissaanut, aammalu kommunini aamma Namminersorlutik Oqartussani isertitanut annertunerusunut malunnartumik ilapittuuteqassapput. Taamaalilluni 2015-imut aningaasanut inatsisissamut isumaqatigiissut malitseqartinneqarpoq, ilaatigut Kalaallit Nunaata tikiffissatut unammillersinnaanerusunngortinniarlugu umiarsuarnut takornariartaatinut akitsuutit annikillisinnerinik nassataqartoq.

Takornarianik akiliisinnaassuseqartunik amerlanernik aggersaanissamut, aammalu takornariartitsinermik suliffeqarfimmit inuiaqatigiit iluanaarutaannik annertusaanissamut mittarfiit ilusaasa allineqarnissaannut nutarsarnissaannullu aalajangiussaqaarnissaq takkuttusaaq partiit pingaarutilittut isigaat. Aammattaaq ukiunut takkuttusanut Naalakkersuisut takornariartitsinermut periusissiaata nutaap oqaluuserinissaa partiit qilanaaraat.

2016-imut aningaasanut inatsisissatut siunnersuummiippoq kontomut pingaarnermut nutaamut siunnersuut: takornariartitsinermut sanaartukkat. Taanna tikeraartunut ingerlatsivittut taaneqartartut, nunap immikkoortuini takornariat tikittarfiinik nukittuunik ineriartortitsinermut ilapittuisussat sanaartornissaannut tapersersuissaaq. Tassunga ilanngullugu kommuninik pineqartunik suleqateqarnissaaq, aammalu Ilulissat Kangiani Takornarianut Sullissivimmuut atatillugu takuneqareersutut aningaasaateqarfinit aningaasaliinernik aggersaanarluni ilungersuuteqarnerni suleqateqarnissaaq naatsorsuutigineqarpoq.

Tamakku saniatigut inuussutissarsiorfiup siuarsarnissaanut iliuutsimut piviusumut takornariartitsinermik suliassaqaarfimmut aningaasaliissutit amerlanerusut atugassiarinissaat partiit isumaqatigiissutigaaq. Piviusutut ukiumoortumik agguuassassat koruunit millionit marluk atugassiarineqassapput, taakku Tunumi takornariartitsinermik suliqaartunit qinnutigineqarsinnaassallutik, taamaaliornikkut Tunumi inuussutissarsiorfiup ineriartortinnissaanut tunngavissiiniartoqarlunilu Islandimut qanittuunerup nassatarisaanik takornariaqarnermut neriunartoqarfik annertooq atorluarniarneqassammat. Aningaasaliinerit nunaqarfinni isorliunerusunilu inuussutissarsiorfinnik suliffeqarfimmillu ineriartortitsinermut konto pioreersoq aqqutigalugu atugassiarineqarput. Tamatuma saniatigut Kalaallit

Nunaanni aliikkutaralugu aalisariartitsisarnerit ineriartortinnissaanut periarfissat ineriartortikkumallugit 2016-ip ingerlanerni misissueqqissaartoqarnissaata Naalakkersuisunit pingaartinneqarnissaa partiinit kissaatiginartinneqarpoq. Tassani aalisariarusuttut akileerusussusaat aallaavigalugu aalisakkallu ilaanut aningaasarsiutigissallugit soqutiginnannginnerusunut tunngatillugu piniarnermik aalisarnermillu inuussutissarsiutini ullumikkornit annertunerusumik nalileqarnerulersitsisinnaanissaq suliffissaqartitsinerulersinnaanissarlu naatsorsuutigineqarmat.

Kiisalu kusanartuliornermut misigisaqartitsinermillu tunisassiorfiup ineriartortinnissaanut Visit Greenlandimut koruuninik 1,6 mio.-nik tapiissutit AIS 2016-imi pilersinneqarqissasut partiit isumaqatigiissutigaa. Tassunga aningaasaliinerit Annertuunut/aatsitassarsiornermut kiffartuussinissamik isumaqatigiissutit konto pingaarnep assinganiittumit nuunneqarput. Allannguut taamaasilluni missingersuutinut allannguuteqanngilaq.

### **Aalisarnermik inuussutissarsiutip ineriartorteqqinnera**

Aalisarnermik inuussutissarsiut ineriartorteqqinniarlugu ilungersuutigisat partiit nangippaat, ilanngullugit sinerissamut qanittumi aalisarnerup attanneqarsinnaalluarnerup pilersinnissaa aamma aalisakkanut ikerinnarmiittunut aalisarnermik ineriartortitsineq. Isumaqatigiissut naapertorlugu aalisakkanut ikerinnarmiittunut aalisarnermut tunngatillugu siunnersuisarnissamut pitsaannerusumik tunngavigisassaq pilersinniarlugu Pinngortitaleriffik ukiumoortumik ilassutinik koruuninik 1,0 mio.-nik tunineqarpoq. UKA2015-imi 2016-imit akitsuuserniarneqartumut aalisakkani isumalluummut ammassammut uumassuilinnik misissuineranut aningaasat atorneqassapput. Avataata imartaani aalisarnerup ineriartortinnissaanut piviusumik periusissiasa pillugu Naalakkersuisut aalisarnermik inuussutissarsiorfimmik oqaloqatiginnippot, pisortani karsinut ilorraap tungaanik sunniummik nassataqartitsisumik aalisarneq tamanna siunissami inuussutissarsiorfimmut isertitaqarnermut suliffeqartitsinerumullu pitsaasumik najoqqutarineqartinnissaa siunertarineqarluni.

AIS2016-imi aalisartunut piniartunullu siunnersuisarnermik Naalakkersuisut tiguisimanerisa sunniutaanik kingusinnerpaamik 2017-ip affaani siullermi Naalakkersuisut nalilersuisimanissaat partiit isumaqatigiissutigaa. Tigusinerup kingornatigut Naalakkersuisut KNAPK-lu siunnersuisarnerup ingerlanneqarnera pillugu oqaloqatiginnittarnissaat partiit naatsorsuutigaa.

Aalisarnermut inatsimmik aqqissuusseqqinnissamik siunnersuut takkuttusaaq partiit qilanaaraat. Aalisartoqarfimmi suliaqartut pingaarnert Naalakkersuisullu akornanni suliap ingerlanneqartup inernerata pitsaasuullunilu siumut sammisuunissaa neriutiginneqarpoq. Sulinermut anguniagassaasariaqarput sinerissap qanittuani aalisarnermik ineriartortitsinermut sinaakkutissat pitsaannerusut, suliaqarfimmi nutaaliornermut iliuuserisat amerlisarnissaat kiisalu nunatta karsianut pisariaqanngitsumik artorsartitsinngitsumik, nunatsinni inuussutissarsiutit pingaarnersaata ineriartorteqqinnissaanut aningaasaliisinaanerup ajornannginnerulersinnissaa.

Aalisarnermut inatsisissap aalisartoqarfimmilu allaffissornerup ullumikkornit aalisarnermi killilersueriaatsip inuussutissarsiummilu pisassiisarnerup siuarsarneranut, inuiaqatigiit aningaasaqarnerannut iluaqutaasup matuma ataani, suliffeqartitsiniarnermut sunniutit, inuussutissarsiummi isertitat kiisalu akileraarutigut akitsuutitigullu pisortat iluanaarutaasa pitsanngortissagai partiit isumaqarput.

## ***Imminut annertunerusumik pilersugarinerup siuarsarnissaanut aaqqissuusseqqinnerit***

### **Attassisinnaanissamut siuarsaanissamullu pilersaarummut aggersumut naleqqat**

Inuiaqatigiit aningaasatigut imminnut napatissinnaalernissaannut alloriarnertut 2016-imut aningaasanut inatsit partiit isigaat, kisianni ukiuni tulliuuttuni amerlasuuni aaqqissuusseqqinnikkut suliniutinik ataqatigiinnerusunik suli pisariaqartitsisoqarpoq.

Partiit maluginiarpaat, Naalakkersuisut siunissami aggersumi suliniutinik aallartisarneqareersunik ilaatigut ingerlatitseqqittumik ungasissumut isigisumik attassisinnaanissamut siuarsaanissamullu pilersaarummik saqqummiussiniartut aamma aningaasanut inatsimmut isumaqatigiissutip ilaatigut pisortat suliassaqaarfiani ineriartortitsisussamik aamma namminersorluni suliaqarfimmi amerlanerusunik sulilersitsinissamut, aningaasaqarnikkut atasinnaasumik ineriartornissamut siunnersuutinik nutaanik saqqummiussisumik.

Aaqqissuusseqqinnissanut pilersaarutit pillugit Naalakkersuisunik oqaloqateqarnissaq partiit qilanaaraat. Imminut pilersorsinnaanerup annertusarnissaa, amerlanerit inuussutissarsiorsinnaanngorlugit ilinniagaqarnissaat, suliffeqarfeqarfimmik ilaatsinerusumik ineriartorfiusumillu aammalu inuiaqatigiinni annertunerusumik naammassisaqarsinnaanermik ineriartorneq pilersaarummi anguniarneqartariaqarpoq. Ataasiakkaat assigiimmik ineriartornissaannut periarfissinneqarnissaat pitsanngorsarniarlugu nunallu immikkoortuini oqimaaqatigiinneq pitsaanerusoq anguniarlugit aqqusiortoqartariaqarpoq.

Aaqqissuusseqqinnerit sulisaatsimut tulluarsarlugit ilanngussinnaanissaat Naalakkersuisut eqqumaffigissagaat, Partiit pingaartippaat. IT-kkut aaqqissuusvivinnik annertunerusumik tulluarsaanermik kommuninillu suleqateqarnermik pitsaanerusumik, sullissisut suliassanut nutaanut piareersimanissaat anguniarlugi kiisalu pisariaqatitanut ersersitsisunik sulisoqarnissaq pisariaqartinneqarpoq.

Taamaattumik aningaasanut inatsisissatut siunnersuummut atatillugu kommunit sillimmataasa sinaakkutaata ukiumut 3,0 mio. kr.-nut qaffanneqarnissaa saqqummiunneqarpoq. Aningaasat atornerqarsinnaassapput, ataatsimut tapiissutit pillugit kommunit ilassutissatut isumaqatigiissusioqatiginerini erserpat, ilimagineqartut uniuullutik aaqqissuusseqqinnermi suliniutit pillugit inatsisissatut siunnersuutit, aningaasaqarnikkut saniatigut kingunerisat naammassimangippata.

Tamatumani saniatigut isumaginninnermut siunnersortit suliassaasa annertussusaat, sulisut amerlassusaannut naleqqiullugit oqimaaqatigiinnerisa pitsaanerunissaat anguniarlugi, isumaginninnermut tunngasunik suliaqarfimmi sullissinerup nukittorsarneqarnissaanut sillimmatit atornerqassapput. Isumaginninnermut tunngasunik suliaqarfimmi pisariaqartitsinerup annertussusaa 2016-imi qaninnerusumik misissuinissami aggersumi erseqqissarneqarpat, Naalakkersuisut kommuninik oqaloqateqarnissaat ilimagineqarpoq immaqalu 2016-imut ataatsimoortumik tapisiat pillugit isumaqatigiissummut ilassutissamik isumaqatigiissusioqarsinnaalluni. Periarfissanik naleqquttumillu nunatsinni isumaginninnermut siunnersortit suliarisaasa qanoq oqimaatsigineri, immaqala suliap pissusaanut naleqqiullugu kiisalu suliaqartussanik tulluurtunik pisariaqartitsinerup tunngatillugu 2016-imi suliat amerlassusii killilerneqassasut misissuilluni sulineri ersersinneqassapput. Suliaqarfimmi aaqqissuusseqqinnerit kingunerisaannik, ukiuni aggersuni isumaginninnermik suliaqarfimmi suliassanik annertuunik kivinneqartussanik ikorfaasussatut.

Partiit eqqumaffigaat, kontumi pingaarnermi 20.11.51 Aaqqissuusseqqinnerit sunniutaat, aningaasanut inatsimmi aaqqissuusseqqinnissamut siunnersuutinik ilaasunik naammassinninneq, aningaasanut inatsisip

oqimaaqatigiinnissaata qulakkeernissaanut kiisalu aningaasaqarnermik atasinnaasumik atatitsiniarnermi ikorfartuinissamut annertuumik pingaaruteqartoq. Taamaattumik pingaaruteqarpoq, sapinngisamik piviusorsioortumik missingersuusiornissaq kiisalu aaqqissuusseqqinnissanut aggersunut aalajangiinissamut tunngavissanik pitsanngorsaalluni ataavartumik sulisoqarnissaa, suliallu aallartinneraniilli kattuffiit sunnerneqartut ilaatinneqarnissaat.

2016-imut aningaasanut inatsisissap atuutsilerneqarneranit 2017-imut aningaasanut inatsisissatut siunnersuutip suliarineqarnissaata tungaanut, Naalackersuisut partiillu ataatsimoorlutik aaqqissuusseqqinneq pillugu kontup iluaniittunik aaqqissuusseqqinnissanik pilersaarutigineqartunik misissuiniarput kiisalu sunniutaasussat ilimagineqartut isertitassallu ilimagineqartut nalilersoqqinniarlugit.

Aaqqissuusseqqinnerup ingerlarnga ukiuni arlalinni ingerlasussaasutut naatsorsuutigineqarmat, piffissap ingerlanerani kontup imai aningaasartaalu allanngorassapput. Aaqqissuusseqqinnernik annertuunik amerlanerpaanik isumaqatigiissutigineqartunik ujarlernissaq siunertaralugu isumaginninnermut, akileraartarnermut aamma ineqarnermut suliassaqarfimmi aaqqissuusseqqinnerit aggersut suliarineqarnerini piviusumik politikikkut aalajangikkamik ingerlaasissamik isumaqatigiittoqarsinnaassaaq.



## ***Inuiaqatigiit toqqissimasumik alliartorsinnaanissaat, inunnut ataasiakkaanut siunissami pitsaasunik periarfissallit***

### **Meeqqanut inuusuttunullu suliassaqaarfimmi iliuutsit imminnut ataqatigiissitat**

#### **”Inuusat atorlugit sungiusartitsineq” aamma angajoqqaanut suliniut ”Meerartaarnissamut Piareerneq” aqutigalugit siusissumik pinaveersaarisisumillu iliuuserisat**

Peqqinnissaqaarfik ”Siusissukkut Iliuuseqarneq” aqutigalugu suliniutinut pingasunut akisussaaffeqaarsimavoq; ingerlassarpiaq Siusissukkut Iliuuseqarneq, ”Inuusat atorlugit sungiusartitsineq”, aamma angajoqqaanut suliniut ”Meerartaarnissamut Piareerneq”. Iliuuserisanut siunertarisaq tassaavoq ilaatigut immikkut pisariaqartitaqartunut ilaqtariinnut meerartaartussanut tapersersuinikkut meeqqat isumassugaanissamik sumiginnagaasut pinaveersaarfiunerini iliuuseqarnerup nukittorsarnissaa, ilaatigut angajoqqaanngortussat meeqqallu akornanni attaveqarfiit misigissutsimullu tunngasutigut pitussimaffiit nukittorsarnissaat, aammalu inuusuttut angajoqqaanerup qanoq ittuuneranik piviusumik takussutissiiviginissaat, kiisalu inuusuttut atoqatigiittarnermi peqqissuseq pillugu ilisimasaannik nukittorsaaviginissaat siunertarineqarlutik.

Siusissukkut iliuuseqarneq suliniutaanermi 2014-imi piviusumik ingerlatsinermi suliassanngorluni ikaarsaariartinneqarpoq, 2015-imi ”Inuusat atorlugit sungiusartitsineq” aamma ”Meerartaarnissamut Piareerneq” suliniutit ingerlateqqinneqarput. ”Meerartaarnissamut Piareerneq” aamma ”Inuusat atorlugit sungiusartitsineq” pitsaasunik inernejartutut tamarmik nalilersugaasimapput.

Nalilersuineri inerniliussat tunaartaralugit 2016-imit suliniutit pineqartut kingullit taakku tamarmik ingerlatsinermik suliassavinnngortinnissaat partiit kissaatigaat. Ilanggullugu DIH-mi qitiusutut immikkoortoqaarfik suliassaqaarfiit iluini najukkani iliuuserisanik tapersersuissaaq, najoqqutassanik ineriartortitaqartassaaq, aammalu suliassaqaarfiusumik nalilersuiuartassaaq. Suliniutit ingerlatarilersinnissaannut ukiumoortumik partiit koruunit 2.500.000 immikkoortippaat.

#### **Isumaginninnermik suliassaqaarfimmi pitsaanerusumik nakkutilliineq, aamma kommuninik pitsaanerusumik suleqatigiinneq**

Meeqqanut inuusuttunullu, soorlulusooq innarluutilinnik suliassaqaarfinni annertuumik sumiginnaasoqarneranik takussutissiisimasunik Naalakkersuisut 2014-imi aamma 2015-imi kommunini sakkortusisanik nakkutilliinernik ingerlassaqaarsimapput. Ilaatigut sakkortuumik nakuusernerit, kinguaassiuutitigut atornerluinerit, aamma paarsinerluinerit pillugit suliarineqanngitsunik nalunaaruteqartarnerit pillugit nakkutilliinerit oqaluttuarinnipput. Meeqqat sumiginnagaasut pillugit suliani annertuumik suliaqartoqannginnermut ilaatigut siulersuisoqarnikkut ataqatigiissaarisooqannginneq, ilitsersuisoqannginneq aamma ilinniartitsisoqannginneq nakkutilliinerup patsisaanerarlugit tikkuarpai. Sumiginnaanernit inuiaqatigiinnut tunngatillugu kingunerisat annertupput, isumaginninnermillu suliassaqaarfimmi suliani kommunit tapersersornissaannut pisariaqarluinnartumik ikiorsiisooqartariaqarpoq. Nakkutilliinerit sakkortusisat tunngavigalugit 2015-imit aningaasanut inatsisissatut isumaqatigiisummi qitiutitamik siunnersuisartoqatigiit pilersinneqarput, taakku kommuninik siunnersuisassallutik, aammalu

meeqqanut inuusuttunullu suliassaqarfimmi pisarialittut piginnaasatigut kivitsinissamik qulakkeerissallutik.

Taamaattorli aamma kommunini nakkutilliinermut aammalu isumaginnittoqarfimmik kivitsiffiginissamik kommunit piginnaasaannik siunissamut tunngatitamik sammisaqarnissamik annertuumik pisariaqartitsisoqartoq paasineqarpoq. Isumaginnittoqarfimmi najoqqutassaatanik allanik kommunit isumaginnissinnaassusaannik assingusumik sukumiisumik nakkutilliisoqarnissaq pisariaqarpoq. Ingammik tamanna suliassaqarfimmi (utoqqalinersiuteqarnermi, sioqqutsisumik soraarnerussutisaqarnermi, aamma ineqarnermut tapiissuteqartarnermi) takkuttussatut aqqissuusseqqinnissanut immikkut isigineqassalluni.

Isumaginninnermik suliassaqarfimmi piginnaasanik piginnaanilinnillu pilersitsiniarluni piffissamut ungasissumut iliuuseqarnissaq pillugu Naalackersuisullu qanimut suleqatigiinnissap pisariaqartuunera kommunit paasivaat, ilanngullugit meeqqanut inuusuttunullu, soorlulusooq innarluutilinnut suliassaqarfimmi, isumaginnittoqarnermi unammillerfissat annertuupilussuit iluarsivigineqassallutik, piffissamullu ungasissumut pinaveersinneqassallutik. Nakkutilliineq ataavartuunerusoq annertunerusorlu, ajornartorsiuteqarfinnik suussusersillunilu tamanna ilutigalugu kommunini isumaginninnermik suliassaqarfimmi piginnaasanik piginnaanilinnillu annertusaaqataasusaaq aalajangiisuulluinnarpoq. Nakkutilliinerup nukittorsarnissaa arlaleriarluni kommuninit, Aningaasaqarnermut Ataatsimiititaliamit, Ilaqutariinnermut Peqqinnissaqarnermullu Ataatsimiititaliamit piumasarineqarpoq, soorlulusooq meeqqat pinsinnaatitaaffiinik sullissisarfiup innersuutigisarsimallugu.

2016-imut aningaasanut inatsisissatut isumaqatigiissutikkut iliuuserisap nukittorsarnissanut ilassutitut aningaasaliissutit immikkoortinneqarput, iliuuserisap kommunit peqatigalugit aqqissuunneqarnissaa ataqatigiissaarneqarnissaalu tunngavigineqassalluni, taakku ulluinnarni isumaginninnermik suliassaqarfiusumi akiisussaaffeqartuummata. Siunertamut tassunga 2016-imi koruunit 3.600.000 aamma ukiuni 2017-2019-imi ukiuni ataasiakkaani tamani ukiumoortumik koruunit 4.300.000 immikkoortinneqarput.

Nakkutillinerup nukittorsarneranut aammalu isumaginninnermik suliassaqarfimmi iliuuserisanik ataqatigiissitsinerup pingaernerup ilaatut kommunit aamma suliaqartut pingaarutillit allat oqaloqatigereernerisigut suliassaqarfimmik aqqissuusinnerminik Naalackersuisut 2016-ip ingerlanerani aamma pitsanngorsaanaasaat naatsorsuutigineqarpoq.

### **Inuusuttut ilinniagaannik amerlanerit ingerlariaqqipallassapput**

Ilinniagaqarfimmi inernerisanut naleqqiullugu isumaginninnikkut iliuuserisap nukittorsagaq iluatsittorlu malitsigisatut sunniutinik ilorraap tungaanoortunik tunisinissaa aamma naatsorsuutigineqarpoq. Kommunit, ilinniartitsisut aamma angajoqqaat suleqatigalugit meeqqat atuarfiannik nalilersuinnermik malitseqartitsinissamut iliuuserisap anguniagaqarfiusup pisarisaqartinneranik Naalackersuisunik partiit isumaqatiginnipput.

Ajoraluartumik ilinniartuni ikinnerussuteqartuinnaat meeqqat atuarfiannik ukiumi tassani qimatsinnermini inuusuttut ilinniagassaannik toqqaannartumik ingerlaqqittarnerat suli paasisassaavoq. Tamanna tunngavigalugu ilinniartut ilinniagaqalernissamut piareersinniarlugit ikaarsaariarnissamut suliassaqarfinnut ukiumoortumik aningaasarpasuit atorneqartarput.

Inuusuttuni saaffigisani (15-18-inik ukiullit) ilinniakkamik aallartitaqarsimanngitsunik nalilersuineq aallartitarisimasaq kinguartoorsimavoq, inaarutigisatullu nalilersuineramik nalunaarussiaq 2015-imi novembarip ingerlanerani piariissasoq maannakkut naatsorsuutigineqarpoq. Nalunaarutip inerniliussaanik oqaluserinninnissaminnik partiit isumaqatigiipput, aammalu tamanna tunngavigalugu tamatuma kingornatigut suliassaasinnaasunut nutaanut pisariaqartitsinernik, sallahortitanik allannguutininik aamma pilersitarisinnaasanik, aamma inuusuttuni saaffigisat annertussusaannik annikilliaruaartitsisinnaasut pillugit isummerniarlutik. Pineqartoq kingulleq pingaartuuvoq, ikaarsaariarfissanut suliassanut aningaasat ilaatigut ilinniartitsisoqarfivimmeersuummata.

Partiit maluginiarpaat, kontumut pingaarnermut 64.13.23 Piareersarfiit, aningaasaliissutit annertuumik qaffanneqarnerisigut, ajornartorsiutip inuusuttut suliffeqannginnerat akiorniarneqartoq kiisalu inuusuttut amerlanerit ilinnialernissamut piareersarniarneqartut. Partiit tunngaviusumik isumaqatigiipput pineqartut pillugit suliaqarneq pingaarnerutinniarlugu, kinguneratigut amerlanerit inuusutissarsiutitigut ilinniagaqalernissaannik kingornalu ataavartumik suliffeqalernissaannut aqutissiuussisussamik. Inuusuttorpassuit suliffeqarfeqarfiup avataaniinnerat kiisalu ilinniarfeqarfiup avataaniinnerat akueriinnarneqarsinnaanngilaq maannakkullu iliuuseqarfigisariaqarluni. Taamaattumik partiit isumaqatigiissusiortut suliamut tassunga pingaaruteqartumut nukinnik amerlanerusunik atuissallutik isumaqatigiipput.

Partiittaaq eqqumaffigaat, ingerlariaqqiffissatut suliniutinik neqeroorutinik allanik pisariaqartitsisoqarsinnaasoq. Taamaattumik partiit isumaqatigiipput partiit Naalackersuisullu akornanni kommunillu ilanngullugit oqaloqatigeeqqittoqareerpat, 2016-ip aallartinnerani atugassanngortinneqartussamik aningaasaateqarfimmik nutaamik pilersitsissallutik. Maannakkut nalilersuinerup ingerlasup inernerit nakkutigalugit atugassanngortitsineq pissaaq, taamaattumik suliniutit sorliit inuusuttunut pitsaasumik sunniuteqarsinnaanersut ilimagineqarsinnaasunut aningaasaateqarfimmi aningaasaatit tutsinneqassanersut, pingaarnersiulluni nakkutigineqassapput. Anguniakkamut ukiumut 3.0 mio. kr.-t konto pingaarnermit 64.01.04 Piginnaasanik ineriartortitsiviusumik pikkorissarnerit aningaasaateqarfittaamut nuutsinneqartassapput. Allannguut taamaasilluni missingersuutininut sunniuteqanngilaq.

***Attaveqartarfiit nukittuut aamma piumassutsimik ingerlatatut kattuffiit aqutigalugit assigiinngisitaarneq***

**Tusagassiorfinnut tapiissutit pitsanngorsakkat, tamanik takunnissinnaaneq annertusisaq, tapiissuteqartarnernullu sinaakktissat aalajangersimanerusut**

***Tusagassiorfinnut tapiissutitut sinaakktissat erseqqissut***

Ukiup kingulliup ingerlanerani tusagassiorfinnut tapiissutit assut oqaluuserisaasimapput. Tusagassiorfinnut tapiissutitut erseqqissunik malittarisassianik, aammalu tusagassiorfinni sinaakktissat atugassarititat pillugit politikikkut persuarsortoqassannginneranik pisariaqartitsisoqarneq pillugu partiit Naalackersuisunik isumaqatiginnipput.

Tusagassiorfinnut tapiissutitut tunioraasarnernut malittarisassianik nutaanik Naalackersuisut suliaqarsimanerannik partiit paasinnissimapput, tusagassiorfinnullu tapiissutitut tunioraasarneq tusagassiorfiit politikikkut aqqissuussivimmit kiffaanngissuseqartuunerannik apeqquutillisoqarsinnaanani attaveqarnaveersaarnissamik tunngavigisaqarnikkut pissasoq naatsorsuutigaat.

Tamatuma saniatigut partiit kissaatigaat tusagassiorfinnut tapiissutitut ukiumoortumik immikkut koruunit 500.000 immikkoortinneqassasut, taakku piviusumik portomut imaluunniit siammartiterinermut tapiissutitut tunniunneqartassallutik. Taamatuttaaq taama ittumik tapiissuteqartarnerup iluseqarneranut tunniussisarnermut malittarisassianik erseqqissunik suliaqartoqassasoq tunngavigineqarpoq.

Kiisalu tusagassiorfeqarfimmi assigiinngisitaarnermut tusagassiorfinnut tapiissutit ilapittuuteqartitsinissaannik partiit isumaqatigiipput. Ilanngullugulu tamatuma qanoq siunertamut tulluarnarpaatut anguneqarsinnaanera Naalackersuisut isumaliutigisariaqarpaat, ilanngullugu tusagassiorfinnut tapiissutitut tamakkiisunit qinnuteqartut ataasiakkaat pissarsiarinnaasaannut sinaakktissanik inissiisoqarnissaq.

***Avalammut aningaasaliissutit amerlanerit, aamma ICC-mut tapiissutit persuarsutigiunnaarnissaat***

Partiit aamma Avalammut tapiissutit koruuninik 200.000-inik amerlisinnissaat kissaatigaat, taamaalilluni kattuffimmut ukiumoortumik tapiissutit tassaalissallutik koruunit 400.000. Tamatumunnga tunngavigisaq tassaavoq Avalak ilaatigut ilaasortani aningaasaliissutini unammillerfissaqarmat, ilaatigullu suliamigut pitsaasukkut Kalaallit Nunaanni ilinniagaqarsimassutsip inissisimaneranik qaffasaanerme assut pingaaruteqarmat.

Aammattaaq ICC-mut aningaasaliisarnerup inissisimaffigisaa partiit oqaluuserisimavaat, ukiumoortumillu koruuninik 3.000.000-inik sinaakutissamik aalajangersimasumik kattuffiup qulakkeernissaa pillugu isumaqatigiissimapput. Tassunga atatillugu pisortanit tapiissutitut naleqqiullugu tamanik takusaqarsinnaassuseq, aammalu ICC-mit naatsorsuutitik tamanut saqqummiussisarnissaq pillugit partiit piumasaqaateqarniarput. Tamakku saniatigut siunissamut tunngatillugu suliarisami ilaanut amerlanernut aningaasaateqarfinit aningaasaliisoqarnissamik ICC-p qinnuteqartarnissaa kaammattuutigineqarpoq.

Aamma partiit maluginiarpaat, kalaallit filmiliaannut tapersiissutigisartakkat ukiumut 1,0 mio. kr.-nik qaffanniarlugit aningaasanut inatsimmi allannguutissatut siunnersuummik Naalakkersuisut saqqummiussiniartut.

***Demokratiimik ingerlassap ilaatut tamanik takunnissinnaaneq annertunerusoq***

Annertunerusumik tamanik takunnissinnaaneq qulakkeerniarlugu ilungersuutigisani partiit Naalakkersuisunik isumaqatiginnipput. Tamanna inuiaqatigiinni demokratiimik ingerlassamut pingaartuuvoq. Manna tikillugu whistleblowereqartarnermut aaqqiissummik pilersitsiniarnermik suliaqarneq tapersersortariaqarpoq, aammalu atorfimmi ileqqorlunnerup akiornissaata atuutsilerniarneranik suliatulli ingerlateqqittariaqarluni.

## ***Pisortani suliffeqarfiusoq sunniuteqarluarnerusoq***

### **Tunisassiorsinnaassutsip ineriartortittuarnissaa, aamma pisortani suliassaqarfiusumi inernerititanik pilersitsisoqarnissap alaatsinaannissaa**

#### ***Tunisassiorsinnaassutsip ineriartortittuarnissaa tunngavigisassatut***

Ukiuni takkuttussani namminersortutut suliffeqarfimmut naleqqiullugu pisortani suliffeqarfiusoq tassunga naleqqiullugu annikinnerusumik alliertussaneranik anguniagaq partiit attappaat. Tassaavoq namminersorlutik oqartussani kommuninilu attartuumik aningaasaqarnikkut ineriartornerup pilersinnissaanut, aammalu namminersortutut suliffeqarfiusumi siuarsarnermik pilersitsinissamut tunngaviusoq.

Taamaattumik pisortani suliffeqarfiusumi tamarmi tunisassiorsinnaassutsip ineriartortittuarnissaa siunissamut tunngatillugu pingaarutilittut piujuartitsisutut tunngavigisaanissaa partiit isumaqatigiissutigaat. Tunngavigisaq aningaasaqarnermi attartuumik ineriartortitsineramik qulakkeerinninnermut ilapittuuteqassaaq, tamannalu ilutigalugu pilersitsinernut nutaanut, politikikkikut sallahangortitanut aningaasaqarnerup tungaatigut inissaqartitsissalluni.

#### ***Iliuserisat anguniagaqarfiusut – ataatsimoorussamik suliassanik iluarsiiisutit, digitalinngortitsineq, aamma suliassanik tigusaqarnerit***

Akilerarutinut akitsuutinullu suliassaqarfimmi isertitat allissutaannut sillimmatit atuutsilernissaat pillugu isumaqatigiissut naapertorlugu aningaasanut inatsisikkut 2015-imut aningaasanut inatsimmi sipaarutaasup ingerlateqqinnissaa kaammattuutaavoq. Sipaarutit taakku isumaqatigiissutip ilaani 2016-imut P&L-imi najoqqutalikkatut pingaarnertut kontoni 1 %-imik sinaakkutitut sipaarutitik ilaneqarpoq, aammalu ukiuni missiliorfiusuni sinaakkutitut sipaarutissat 2 %-inut annertusineqarlutik. Taamaattorli tassani peqqinnissaqarfik aamma kommuninut tapiissutit sipaaruteqarfiunngillat, ilinniartitsinermillu suliassaqarfiusoq affaannarmik eqqorneqarluni.

AIS 2016-ip pingajussaaneenera sioqqullugu suliffeqarfiusut innersuutigisaat aallaavigalugit 1 %-imik sipaaruteqarneq atuutsinneqalissaaq. Suli 1 %-imik qaffallugu sipaarutissat AIS 2017-ip sularineranut atatillugu agguataarneqarlutillu ilanngussorneqassapput. Sipaarutit taakku assigiimmik sunut tamanut sipaarniuteqarfiit aqutugalugit atuutsinneqalernissaat pinnagu anguniagaqarfittut iliuuseriniarneqassanerit anguniagaavoq.

Taamaattumik ingerlassanik digitalinngortitsineramik, piginnaasanik ineriartortitsineramik, ataatsimoorussatut kiffartuussineramik iluarsiiisutitik, pisortat pisiortornermik politikkerisaannik aqqiissuussineramik, aammalu suliassaqarfiusuni aningaasartuutaasunik misissueqqissaarinernik Naalackersuisut anguniagaqarfialugu suliartaarnissaat partiit pingaartuusutut isigaat. AIS 2017-ip piareersarneranut atatillugu ilaatigut makku pillugit piviusunik pilersaarusiortoqassaaq:

- Namminersorlutik Oqartussani avataanit siunnersuisartut atugarinerisa pitsaanerusemik aqunneqarnerat,
- Namminersorlutik Oqartussat IT-mik ingerlataqarnerata tamaat isigalugu sunniuteqarluarnerulersinnera akikillisinneralu,
- Danmarkimi namminersorlutik oqartussat ingerlatsinermi aningaasartuutaasa pitsanngorsaanerit aammalu atuuffinnik tigusinnissinnaanerit aqutugalugit annikillisinnerat,
- qitiusumik aqutsisoqarfiup iluarsaannerata pitsanngorsarsinnaanera,
- sillimmasiisarnermik suliassaqarfimmi namminersorlutik oqartussat aningaasartuutaanik annikillisitsineq, aamma
- pisortani suliffeqarfimmi aningaasartuutit inissisimaffiata annikillisinnissaa pillugu kommunillu isumaqatigiissutaasinnaasoq.

### ***Missingersuusiornermut inatsit nutaaq***

2016-imi missingersuusiornermut inatsisip annertunerusemik misissornissaanut Naalackersuisut siunnersuuteqarnissaat partiit naatsorsuutigaat. Inatsit pisortani suliffeqarfimmut tamarmut atasuusariaqarpoq, pisortat aningaasartuutaannik pitsaanerusemik aqutsinerup qulakkeernissaanut piviusunik sakkussanik tunniussaqaqtariaqarluni, aammalu piffissamut ungasissumut, akimuisumik qullersassatullu pingaarnersiuinissamik periarfissiissalluni.

## Ilanngussaq 1.

### Pingajussaaneerera – aningaasartuutit 2016-imi aningaasanut inatsit pillugu isumaqatigiissummi ilanngussat

Aningaasat kr.-inngorlugit	2016	2017	2018	2019
<b>Aningaasanut inatsit pillugu isumaqatigiissummi aningaasartuutit:</b>				
27.01.07 - ICC – ukiumut aningaasaliissutit 3,0 mio. kr.*	600.000	1.605.000	1.615.000	1.615.000
30.01.01 –Ilaqutariinnermut naalackersuisoqarfimmut isumaginnittoqarfimmut nakkutilliinissamut aningaasaliissutit	3.600.000	4.300.000	4.300.000	4.300.000
34.11.03 – Suliniutinut “Inuusat atorlugit sungiusartitsineq” aamma “Meerartaarnissamut Piareerseq” aningaasaliissutit	2.500.000	2.500.000	2.500.000	2.500.000
40.94.14 – Avalak-mut tapiissutit	200.000	200.000	200.000	200.000
40.94.28 – Nunatsinni tusagassiutinut naqitanut tapiissutit/siammartiterinnermut tapiissutit	500.000	500.000	500.000	500.000
20.05.31 – Kommunini aningaasartuutaanerusussanut immikkoortitat annertusisat	3.000.000	3.000.000	3.000.000	3.000.000
20.95.01 – Filminut tapiissutit	1.000.000	1.000.000	1.000.000	1.000.000
20.11.70 – Inuusuttunut suliniummut aningaasat agguagassat	3.000.000	3.000.000	3.000.000	3.000.000
64.01.04 Piginnaasanik ineriartortitsiviusumik pikkorissarnerit	-3.000.000	-3.000.000	-3.000.000	-3.000.000
<b>Katillugit</b>	<b>11.400.000</b>	<b>13.105.000</b>	<b>13.115.000</b>	<b>13.115.000</b>

\*: Aningaasaliissutit naatsorneqarput ICC-p sipaarniutissai ilanngutereerlugit